



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tir\_yimiyim



tir yimiyim

TAPAK 7

**World Cup asayatsü lia Nico Williams hamstring yirugo**

**Philippine VP Sara Duterte anema ken o tanaben benoker**

VOL. XXIII ISSUE NO. 208 (ADOK 208) DIMAPUR SANGTENNÜ (TUESDAY) MONUPII (MAY) 12, 2026

₹ 5.00

## PM Modi-i totzü apayua amshitsü ayongzüker roadshows aliba lutsür

New Delhi, May 11, 2026 (Agencies): Prime Minister Narendra Modi-i Deobarnü India nunger dang totzü ajema amshitsü, hon malitsü aser akokba tashi kidang nungi mapa inyaksü mepishiba ajanga ashishitep ken o tulu ka adokoigo.

Iba ajanga Hombarnü stock market nung jenjang tera ajema aküm aser social media nung MPM Modi lutsür. Pai apayua amshitsü mepishiba aser pai roadshows aser convoys sentongtem agiba medemdanga nisungtemi pa aitsür.

May 10, 2026 nü Hyderabad nung BJP rally ka nung PM Modi-i sensotem dang petrol aser diesel ajema atsüksü, metro services aser carpool benshitsü, electric vehicles amshitsü, kidangi nungi mapa inyaksü, bendanglen senzusenbong athitsü aser kum ka atema hon malitsü tayongzüka agütsü.

Centre sorkari "Modi 7 Appeals" ta aser tongti onüktem adenba noksa ka prokshi aser social media handles nung belenshi.

West Asia nung US-Iran mangatetep ajanga crude oil jenjang teimba akümer aser global supply chains nung meinprongba ajanga India indang foreign exchange reserves nung



kongshir ta Modi-i ashi.

"Asenoki kechi südir süaka foreign exchange kumzüka ayutsüla. Hon aser petroleum products ya tangalen nungi bener arudang dollars nung menoker" ta pai ashi.

Iba osang prokshiba sülen social media nung Modi-i Jamnagar, Gujarat nung roadshow ka aliba video tem prokshi. Pa low fuel average agütsüba armoured SUV ka nung mener aser gari aika adenba convoy kati meiner senzür ta nisungtemi lutsü.

Hombarnü PM Modi-i Somnath nung roadshows ali aser Vadodara nunga ka agitsü atema apusoa ao. Iba ya pai ghonda 12 tsüngda roadshows

asem agiba liasü ta X amshirtemi ashi.

Yashi pai iba onük mejembidang Patna aser Kolkata dena roadshows pungu tashi agia liasü.

"Modi-i Hyderabad nung totzü apayua amshitsü, metro amshitsü, carpool asütsü, kidang nungi mapa inyaksü, hon malitsü ashi. Ghonda ana lir külen Modi-i Jamnagar nung Roadshow ali. 5 km/l indang Range Rover-type SUV nung mener aser pa sülen convoy tulu anidak" ta X nung nisung kati ashi.

"Modi'er tayimtsütem aser convoys-ibo petrol mesüra diesel mamshir. Tzü agi dang senzür" ta Deepal Trivedi ta ser nisung kati X nung metetdaksü.

Ano, senior columnist aser Rajya Sabha MP Mrinal Pandey-ibo Modi'er convoy nung garitemji "cow urine mesüra sugarcane juice" ajanga senzür ta asüngdanga liasü.

"Modi-i taoba ita ka tsüngda public sentong 40 aser gari 100 tema adenba roadshows 10 tashi

agi. private planes aser helicopters ajanga senzür" ta Mohit Chauhan-i ashi.

Prime Minister Modi-i taruba Hokolbarnü anogo tenetnü atema UAE, Sweden, Netherlands, Norway aser Italy sema senzütsü atema apusoa aotsü lia pai public dang kum ka atema 'foreign travel' masütsü metetdaksü.

"Iba ya shisa taka o masü, tamakok indang kulitem lir. Pai kum 12 tashi Prime Minister inyaka arudang public dang kechi alitsü, kechi malitsü, koloni aotsü, koloni maotsü ashitsüsa jenjang kati bener aluogo. PM-i linük ketdangüsü anitsü shisatsü mali kumogo" ta Congress lennir Rahul Gandhi-i ashi.

"Totzü jenjang atuba dena sen endokba ajemtsü atema inyakyim tesashi kar tenzüksü akok. Item inyakyim agizükdaksütsü asoshi osang prokshir" ta Congress communications incharge Jairam Ramesh-i ashi.

"State pezü aser UT ka nung elections agiba sülen ang kechiba

tebilemtsü bilemteter?" ta Samajwadi Party tanishir Akhilesh Yadav-i ashi.

"Election mapang BJP lennirtemi chartered flights meyrjang aika agi. Item tayimtsütem tu tzü agi jaja asü?" ta paisa asüngdang.

2024 Lok Sabha campaign nung "Opposition-i Hindu tsürtem dang nungi mangalsutra rakzüksü ta Modi-i tai tongloktsü, aser ibaji sobaliba nungi hon benshia aruba onük ka ama züngshi, tangbo pai kasa sensotem dang hon malitsü ashir" ta RJD tanishir Tejashwi Yadav-i ashi.

Külen, IT workers tenüng nung telok kati Hombarnü Union labour ministry dang sorkari company tem dang kidang nungi mapa inyaksü tetuyuba ka agüjang ta shidi züluogo.

Covid-19 wara ajanga large-scale remote work inyaktetba kuli sayuogo ta union-i ashi.

Nisungtemi gold sector atema tebilemtsütem lemsatop aser nisung kari social media nung jewellery industry nung nisung 4 million (49 lakh) shi mapa inyaker ta ashi.

"Iba ya chichiba temepishiba ka masü, saka asadanger inyakba mapa ka lir. Renema liang. Iba ya diesel aser petrol jenjang aika atutsü atema okila lapokba dang lir" ta social media amshir kati ashi.

"Tesüiba ita ana tsüngda commercial LPG cylinder jenjang anaben tuogo. Hopta aika mimbanga ayuba khuret ajanga timtem tulu bentsür arutsü" ta nisung kati ashi.

## Mkg police-i yi pongdang tazüng aika apu

Dimapur, May 11, 2026 (TYO): May 8, 2026 aonung 9:00 ako meta Mokochung Police-i "On Army Duty" ta züluba gari ka nung yi pongdang tazüng aika bena aliba apu.

Police-i sewak gate tesem nung ajungbena garitem mita repringdang TATA gari (B/R No.AS 25 DC 9621) nung yi pongdang tazüngtem bena aliba angu. Iba gari ya army indang ama sayua tiyazü nung "On Army Duty" ta zülur liasü aser Mc. Dowell rum pongdang tazüng 15824 bena liasü.

Mc. Dowell rum pongdang tazüngtem ya yi meyokteper ayoktsü mesüra yanglutsü atema alitsü akok ta temulung meleme bilemer.

Iba dak sendakba nung nisung pezü puogo aser parnok ya Rongsentoshi Ao (29), Limanungsang (26), Hassan Ali (25) aser Ruhul Amin (27) nunger ta jangaogo.

Iba dak sendakba nung NLTP act nung ken o ka benokogo aser bushisüngdang südar, ta Addl. Superintendent of Police & PRO, Mokochung-i sangdong ka nung ashi.

## National Consultative Workshop nung Nagaland-i sempet angu

Dimapur, May 11, 2026 (TYO): May 11, 2026 nü Ministry of Electronics and Information Technology (MeitY), Government of India-i Nagaland dena Gujarat, Rajasthan aser Karnataka state tem nem tenüngsang agütsüogo.

New Delhi nung "Strengthening Cybersecurity Framework for State Data" indang National Consultative

Workshop alidang DigiLocker integration atema state pezü nem sempet agütsü.

Department of Information Technology & Communication, Government of Nagaland tenüng nung Director, IT&C Er. Sabou Yashu aser Nagaland State e Mission Team (SeMT), National e Governance Division tenüng nung Meghna Priya nati sempettem agizükogo.

## Nagaland nung May 15 tashi tsüngsang majungtsü

Dimapur, May 11, 2026 (TYO): Nagaland State Disaster Management Authority (NSDMA)-i anogo pezünü atema weather advisory agütsüogo aser iba nung Nagaland nung tsüngsang majungtsü shia lir.

May 12 nungi 15 tashi Nagaland kübok district aika nung tsüngmok atena yipru aitsü, tsüngi aitsü aser tsünglu kanga arutsü ta NSDMA-i metetdaksüogo.

May 12 nü Kohima, Wokha, Mokochung, Longleng aser Mon district tem nung tsünglu arutsü saka tanüngba district tem nungbo weather warning tulu mali ta parnoki ashi.

May 13 nü Kohima, Chümoukedima, Dimapur, Peren, Wokha, Mokochung,

Mon, Longleng aser Tseminyu district tem nung tsünglu aritsü.

May 14 tashi district aika nung tsüngmok atena yipru aitsü aser tsünglu arutsü aser Longleng district nung tsünglu kanga arutsü ta NSDMA-isa ashi.

May 15 nü Kohima, Chümoukedima, Dimapur, Mokochung, Mon aser Tseminyu district tem nung tsünglu terara arutsü aser Mon district nung tera talila arutsü.

NSDMA-i nübertem dang kümdanga alitsü aser tsüngsang majungdang süngdong mesüra electric poles kübok malitsü tekümdangtsü metetdaksüogo.

Parnokisa lendenlen aser tzü atüngdak alirtem dang ajungben tüzümetüng, aser anentsüh nungi kümdanga alitsü metetdaksüogo.

NSDMA-isa nübertem dang Safer Nagaland App download süa amshitsü ayongzüko.

Dimapur Deputy Commissioner & District Disaster Management Authority (DDMA) Chairman-i May 13, 2026 nü DDMA Dimapur District atema 1st Quarterly Pre-Monsoon Preparedness Meeting alitsü metetdaksüogo.

Iba senden ya nikongdang 1:00 ako nung Deputy Commissioner Office, Purana Bazar, Dimapur indang Conference Hall nung alitsü.

Dimapur Deputy Commissioner & DDMA Chairman Dr. Tinojongshi Chang, NCS-i sendaktepa alir ajak iba senden nung adentsü mepishia metetdaksüogo.

## Advisor Khamo-i GBs tem tasü ita nübur tenzüksü ajungmeso



Hombarnü Rihuba nung Chokri Area GB's Union inti mungdang alidang tangokba noksa ka nung Advisor Kudecho Khamo den CAGBU ketdangpurtem angur.

**Kohima, Monupii/May 11 (TYO):** Hombarnü Advisor, Civil Administration Works Division (CAWD) and Taxes, Kudecho Khamo-i Gaon Buras (GBs) tem dang tasü ita, ochi aser tangatetba teindang nung nübur tenzüksü ajungmesoa liasü.

Phek district kübok CAPO Hall, Rihuba nung Chokri Area GB's Union (CAGBU) indang inti mungdang nung jembidang, Khamo-i yimtsüng ketdangsüba melenshia aruba indang tongmelang agi lemsatet aser GBs temi lokti nung akumtsüboa amshitsüsa mapa tajung inyaka arur, ta ashi.

GBs temi coat sentüsü temerem asema ajanga parnok ya nüburtem madak ketdangsürtem ta jangjar, ta pai ashi.

GBs tem ya kin-kidong, khel aser nüburtem anüker aser kumzüka ayurtem ama lir, anungji pei mapa ochishia tangatetba tajung nung inyaksüla, ta Khamo-i ayongzüük. Paisa tasü ita aser temulung ulushir nübur tejangraba wazüka ayutsü ajungmesoa liasü.

GBs tem akumtsüboa amshitsüla, kechiaser parnok ya sobaliba jenjang madak ketdangsür ama lir, aser parnok shilem ya tejakleni aoba lokti atema tongtipang lir, ta Advisor-i ashi.

Naga nung loktiliba nung telemsa tali akumba tebilemstü lemsatetpa, Khamo-i GBs tem dang sobaliba tajung amshia telungjem nung nokdaksü ayongzüka liasü.

Ken o ajak nung sen ya kisüng menüngdaker, aser asenoki loktiliba aser yimtenren junga shisadanga Khristan yimya nung ochishia aser tasü ita tenzüksüla, ta ashi.

Constitution of India nung zülua aliba Article 371 (A) yagi Nagaland wazüka ayutsü aser tajangzüük agitsü melar, aser ibaji wazüka ayutsüla aser tashi itshtisüla, ta pai ashi.

Pai Chief Minister Neiphiu Rio lenisüba nung tenüngsang agütsü aser sorkari nübur ajungtsü asoshi inyaker aser state nung senotsü jenjang tajungba kumtar, ta ashi.

Paisa nüburtem dang terenlok maparen nung sorkar den külemi yaritepa inyaksü

ayongzüka liasü.

Iba sentong nung Chokri Area Public Organisation (CAPO) tir Vepozoyi Theyo-i jembidang, GBs nem takum tepiyong inyaksü mapa agüja lir ta ashi aser nübur meyong ki o jen anepalua aser wazüka ayutsü ayongzüka liasü.

Pai CAGBU züngsemtem dang ochi nung nokdaksü aser indang-indanga alitsü ajungmesoa liasü.

Hünietsü Vero, Head GB Pfutsero Town ajanga iba sentong nung o tatsüka jembia liasü.

Iba sentong tenzüka CAGBU chairman Resamu Rhakho-i pela agizükba o jembia liasü aser züngsem temi amalitep akaba asoshi pelaba lemsatet aser nübur telungjem asoshi inyaker ta ashi.

Iba sentong nung Vethikho Ngoi, general secretary, CAGBU menden liasü, Kuzhoto Kezo, Pastor, Rihuba Baptist Church ajanga sentong tenzüka sarasadem.

CAGBU vice chairman Vechosa Vero-i melepzüng o jembi aser Sekhota Thingo, Chairman, NPC Chokrija ajanga sentong tembanga sarasadema liasü.

## Mon nung PMDDKY indang senden amen



MP Rajya Sabha, S Phangnon Konyak lenisüba kübok May 11, 2026 nü Deputy Commissioner, Mon indang Conference Hall nung Mon District Development Coordination and Monitoring Committee (DISHA) senden amendang tangokba noksa nung angur.

**Dimapur, Monupii/May 11 (TYO):** Pradhan Mantri Dhan-Dhaanya Krishi Yojana (PMDDKY) indang senden ka May 11, 2026 nü Deputy Commissioner, Mon indang Conference Hall nung MP Rajya Sabha, S Phangnon Konyak lenisüba kübok mena liasü.

Iba senden nung Deputy Commissioner, Mon, Wennyei Konyak, NCS-i züngsemtem pela agizükba o jembia liasü.

Senden nung departments

of Agriculture, Fisheries, Veterinary, Cooperation, Water Resources, District Industries Centre, Land Resources, Rural Development, Employment, aser Horticulture ajanga PowerPoint nung küm shia department-i inyaka indang lemsatetpa liasü.

Iba senden nung PMDDKY inyaka indang kanga aroka jembishinüa liasü aser MP Phangnon-i

department ajanga dang temulung agüja inyaksü aser scheme takok ngua inyaksü atema amalitep akatsü ayongzüka liasü.

Laisa department ajanga dang detailed repors yanglutsü aser iba scheme kübok senotsü amshitsü aliba kuli shidak agütsü totuyuba agüja liasü.

Taruba senden ya June ita amentsü aser iba mapang PMDDKY indang kisüng jembitsü, ta laisa metetdaksü.

## Dimapur nung mejangjaba tasü mang ka nguteta lir

**Dimapur, Monupii/May 11 (TYO):** Mejangjaba nisung (tebur, non-Naga) arishi küm 45-50 tsüngta tasü mang ka flyover teküboklen Railgate opposite Traffic Control Dimapur anasa nguteta lir ta May 10, 2026 nikongdang 1:30 ako meta telephone ajanga osang ka aru. Iba osang angazükba sülen duty nung alirtem iba tesem bushia ao, ta Dimapur Police sangdong ka ajanga ashi.

Parnoki iba tasü mang meita reprang aser yasa-tzüra mesüra shiranga asüba südi ta temulung melemtetsüsa

parnoki bushitet. Ozüng agi melaba maparen ajak inyakba sülen tasü mang ya PM examination/identification atema District Hospital Dimapur Morgue nung bener oa lir, ta sangdong ajanga ashi.

Nisungba ya vest sentüsü temesüng, pants sentüsü puipuir aser underwear sentüsü tanak sema liasü.

Kibur/kinunger/tembar temi Officer-in-Charge, East PS, Dimapur den mobile No. 7085055020 nung

tongterateptsü ayongzüker, ta Dimapur Police sangdong ajangasa ashi.

## Dimapur Press Club-i asükhü lemsatetper

**Dimapur, Monupii/May 11 (TYO):** Delhi nung May 10, 2026 nü Dimapur Press Club züngsem Ashikho Pfuzhe adianu Choro Pfuzhe asüba asoshi mangyim-jashi lemsatetper, ta DPC sangdong ka ajanga ashi.

Asür Choro Pfuzhe ya Oriental Insurance Company

Limited nung Deputy Manager inyaka liasü.

DPC-i Ashikho Pfuzhe aser mangyimer kibong den asükhü lemsatetper. Parnoki tashi aser anisingzüük angutsü aser asür tanüla tesunep nung anisingzüüksü asoshi onoki sarasademtsür, ta Dimapur Press Club sangdong ajangasa ashi.

## Shamator village nung ango metsür nem training agütsü



Shamator village nung ango metsür nem training agütsüba sentong nung tangokba noksa nung angur.

**Dimapur, Monupii/May 11 (TYO):** Department of Fisheries and Aquatic Resources ajanga Training and Extension kübok Best Management Practices in Fisheries for Fish Farmers training ka May 11, 2026 nü Shamator village Council Hall nung ayongzüka liasü.

Iba training nung Shamyung O. Ongh, DFO, Shamator ajanga ango metsürtem dang food security, livelihood generation aser rongsenketzüng tajangzüük atema ango metsüba tajangzüük indang lemsatet. Ango tanen makai metsüra tzi nung aliba rongsen wazüka ayutsü atema Best Management Practices (BMPs) ya tongtipang lir, ta lai ashi.

Lai ango metsürtem dang tziübo müreka ayutsü, ango metsü aser chiyongtsü tajung amshitsü aser oxygen level, pH aser temperature ama tzi indang quality parameters teti tendanga

alitsü ajungshia liasü.

Tesem ka nung ango tali memetsütsüla, kechiaser ibaji ajanga tashidak adoktsü aser ango ainba nung tmtem agütsür, ta Shamyung-i ashi.

Tashidak prokshia aoba nungi kumzüüksü atema ango tasü tim yimya nung indoktsü indang jembi aser tzi nung aliba rongsen wazüka ayutsü aser anasa ayong, awatsüng aser wetlands tem memententsü ayongzüka liasü.

Laisa ango metsürtem dang modern scientific techniques angazüüksü, productivity tajungba akumtsü aser rongsen lenmang tajungba kumdaksütsü mechi training aser awareness programmes amala nung adentsü ayongzüka liasü.

Iba training nung Ruth Kikon, AFI, Shamator-i pond liming aser ango nung tim yimya nung chiyongtsü agütsüba sayua liasü. Iba training nung ango metsür nisung 40 shi aden.

## Subash Chandra Bose Aapda Prabandhan

### Puraskar atema nomination meshir

**Dimapur, Monupii/May 11 (TYO):** Deputy Commissioner, Chümoukedima ajanga district nung Heads of Offices ajanga dang Subash Chandra Bose Aapda Prabandhan Puraskar (Award) atema nomination asoshi metetdaksüogo.

Disaster management nung alakteta shilem agiba, bendanga agütsüba aser tatishitsü tajung

sayua tenzükba temaitsü kija, institutions aser lokti tentet nem iba sempet ya agütsür.

Chümoukedima district kübok departments aser offices ajanga dang temsa aliba kija mesüra lokti jangjateta aser nomination agütsütsü ayongzüker. Nomination ya ano sorkar nem agütsütsü, ta sangdong ajanga ashi.

# Rajnath lenibanung IGoM senden mena energy tensa asadanga



May 11, 2026 nū New Delhi nung Defence Minister, Rajnath Singh leniba nung energy security asadanga senden amendang tangokba noksa nung angur.

**New Delhi, Monupii/May 11 (Agencies):** Hombarnū New Delhi nung Defence Minister, Rajnath Singh leniba nung 5buba IGoM (Informal Empowered Group of Ministers) senden mena energy supply chain aser linük nung petrol/diesel aser gas nungdakba tensa asadangogo, ta ketdangsertemi metetdaksü. Iba senden nungji Union Minister tem- JP Nadda, Hardeep Singh Puri, Kinjarapu

Ram Mohan Naidu aser Kiren Rijiju nunger den tongti ketdangsertem aika liasü. Anogo ka tejaklen Ato kilonser, Narendra Modi-i nūburtem dang petrol, diesel aser gas kanga kümdanga amshitsü ayongzüka liasü. Tesülen Rajnath Singh-i X ajanga, "Ni nūburtem dang maoksatsü mepishir, kechiyong linük nung energy peria angutsü atema sorkari telemtetbatem agia inyakdar,"

ta metetdaksü. Amongnū Ato kilonser Modi-i totzü kanga kümdanga amshitsü metetdaksüba dak sendakba nung Rajnath Singh-i, "Ato kilonser Modi-i iba tayongzüka agütsübaji tangar dak memetaloki alitsü atema aser energy security atema tongtibang asütsü. Alima nung timtem ajangshiba mapang nung Ato kilonseri wazüka ayutsü atema ajungshir," ta metetdaksü.

# July 1 nungi MGNREGA melen VB-G RAMG mapa küma benoktsü

**New Delhi, May 11 (Agencies):** July 1, 2026 anogo nungi tenzüka linük tesem ajaklen Viksit Bharat - Guarantee for Rozgar & Ajeevika Mission (Gramin) Act, 2025 (VB-G RAM G) mapa küma benoktsü, ta sorkari metetdaksüogo. Iba ozüng tasenba ya ajanga Mahatma Gandhi National Rural Employment Guarantee Act (MGNREGA), 2005 melentsü. Ozüng tasenba kübok yimtsüngtem nung kibong shia nem anogo 100 aayangtsü maongka agüja aliba nungi anogo 125 kümtsütsü. Iba atemaji Centre sorkari 2026-27 kümsük atema union budget nung sen crore 95,692.31 lemsüktsüogo. Iba dak alia state tem senpong nungia senotsü tsükba densemabo iba scheme nung küm shia sen 1.51 lakh crore adoktsü. Union Agriculture & Rural Development Minister, Shivraj Singh Chouhan-i,

anogo asem tsüngda aayangba senji agütsütsü atema inyaksü aser senotsü menoa magutsü nunga iba atemaji aayangertem nem temenok densema agütsütsü, ta metetdaksü. Ministry of Rural Development-i ashiba agi, MGNREGA kübok tang teinyakdak mapatemji kecha tetsükdaksü makai June 30 anogo tashi inyaktettsü, iba sülen June 1 nungi mapatong tasenbaji benoktsü. Iba dak alia "Gramin Rozgar Guarantee Cards" magütsü tashi tang aliba e-KYC verified MGNREGA job cards ji tagila asütsü, ta Ministry-i metetdaksü. Sorkari iba sangdong agütsüba sülen Parliamentary Standing Committee on Rural Development & Panchayati Raj Chairman aser Congress MP, Saptagiri Ulaka-ibo, iba inyakym ya junga merenemi benoker, ta aitsüogo. Ulaka-isa shilem aika küma lemsar iba mapatong

benoktsüla, ta ashi. Paise, inyakym tejen ka aser tasen ka khenyongi melenshia benoktsü makok, scheme ana tsüngdaji ishiba agia ita trokbo alitsüla, ta ashi. Paise, July 1 anogo tashi MGNREGA atema senotsü peria mali, ta ashi. "Iba dak alia Centre aser sorkar tsüngda 60:40 ratio (Centre-i senotsü shilem 60 aser state temi senotsü shilem 40) inyakymji ajanga state aikati iba mapatong benokba nung shilem junga magitetsüa akok, aser ibaji ajanga iba Act tashi meiti kümdaksütsü," ta paise shisem. Mahatma Gandhi National Rural Employment Guarantee Act scheme ya Congress-i aniba UPA sorkar mapang nung benoka liasü ajisüaka tang Centre nung NDA sorkari Viksit Bharat - Guarantee for Rozgar & Ajeevika Mission (Gramin) Act, 2025 (VB-G RAM G) ya benoka agizükogo.



Chennai, May 11, 2026: TVK tongti, Joseph Vijay-i Tamil Nadu Chief Minister tenangzüka agiba sülen anogo ka dang lir Hombarnü pai taoba Chief Minister, MK Stalin ajurudang tangokba noksa nung angur. Kasa noksa nung MK Stalin'er jabaso, Udhayanidhi Stalin-a angur. Tawa assembly election nung Vijay-i aniba Tamilaga Vettri Kazhagam (TVK)-i takok tulu ngua MK Stalin-i aniba Dravida Munnetra Kazhagam (DMK) sorkar atsüngdokogo.

# 2024 küm soseta asürtem shilem 31 bo anogo shia aayangertem liasü

**New Delhi, May 11 kumogo. (Agencies):** 2024 küm India nung soseta asürtem shilem 31 bo anogo shia aayangertem liasü, aser ibaji küm tersü (2015-2024) nung shilem teimba liasü, ta tawa National Crime Records Bureau (NCRB) report ajanga metetdaksü. 2024 küm anogo shia aayangertem parnok 52,910 soseta asü, aser ibaji 2022 küm den medemdangra 2022 küm nungbo shilem 26.4 dang liasü. India nung mapa inyakertem shilem 20 bo casual labourers category kübok lir. 2024 küm India nung nisung lakh 1.7 soseta asüba nungi anogo shia aayangertem 52,000 dak tali liasü. 2015 küm nunga nisung lakh 1.34 soseta asü, ta NCRB-i metetdaksü. 2015 küm nungi tenzüka India nung soseta asürtemji teimbaka anogo shia aayangertem, kinüngtsürtem aser pei sasa apiteta mapa balala inyakertem lir. Ajisüaka tesüba küm 10 tsüngda kinüngtsürtem aser pei sasa mapa balala apiteta inyakertem soseta asübabo kanga ajema

Iba denji kasa aluyimba sector nung inyakertem (aluyimertem aser alu nung aayangertem) soseta asüba-a kanga ajema kumogo. 2016 küm India nung soseta asürtem shilem 8.7 aluyimertem liasü saka 2024 küm nungbo soseta asür aluyimertem shilem 6.2 dang liasü. 2016 küm nung ang NCRB indang Accidental Deaths and Suicides in India report nung aluyimba category ya züngoka liasü. 2024 küm India nung anogo shia aayangertem teimba soseta asüba state ji Tamil Nadu (10,556) liasü, iba sülen Maharashtra (6,811), Telangana (5,745), Madhya Pradesh (5,299) aser Chhattisgarh (3,413) state tem liasü. 2024 küm Delhi nunga aayangertem parnok 343 soseta asü. 2024 küm India nung soseta asürtem shilem 62.3-i lisü agi alenseta asü, shilem 24.5-i miim chia/jema asü, shilem 4.4-i tzu nung arakseta asü aser shilem 2.5-i gari/ train lenmang nung pungoka menüngsetdaksü.

# Congress-i taoba mapang Kerala nung Congress Tir inyakertem jaok

**New Delhi, May 11 (Agencies):** Tawa Kerala assembly election nung Congress-i takok anguba sülen tang tashi Chief Minister menden atema telemtetba magiteti lia Hombarnü Delhi nung Congress bangdak lenirtemi taoba mapang Kerala Pradesh Congress Committee (KPCC) nung Tir inyaka arurtem jaokogo. Bangdak lenirtemi K Sudhakaran, K Muraleedharan, VM Sudheeran aser

UDF teloktep nung aliba IUML-ia CM menden atema Satheesan pusemer. Ano Lok Sabha nung opposition lenir Rahul Gandhi-ibo CM menden ya AICC general secretary/Alappuzha MP, K.C. Venugopal nem agütsüner, ta osang angazüker. Bangdak lenirtemi temelaba agütsüba sülen ang Kerala Congress Legislative Party (CLP) senden mena lenir shimtsü.

Mullappally Ramachandran nunger densema Kerala unit nung lenir taintem aika jaok. Tawa assembly election nung Congress-i aniba United Democratic Front (UDF)-i takok anguba ajanga Communist Party of India (Marxist) [CPI(M)]-i aniba Left Democratic Front (LDF) sorkar atsüngdokogo. Kerala nung VD Satheesan, Ramesh Chennithala aser KC Venugopal nungeri Chief Minister menden aginer, aser parnok pusemertemi party sasep nung aser yimjak nung par lenir CM shimtsü atema jembir. UDF teloktep nung single largest party ji Congress lenir (menden 63) aser teloktep nung aliba IUML MLA tem densemabo majority lir. Ano külen tanga osang ka nung, taoba assembly nung Opposition lenir, V.D. Satheesan-ibo odiodia pai CM menden dak alaka tanga menden kecha magizüksü, ta shiogo.

**IN THE GAUHATI HIGH COURT**  
(The High Court of Assam, Nagaland, Mizoram & Arunachal Pradesh)  
**KOHIMA BENCH**  
**MAC APPEAL NO. 03 of 2026**  
National Insurance Co. Ltd.  
..... Appellant  
- Versus -  
**Smti. Apu Sen & 2 Ors.**  
1. Smti. Apu Sen,  
Mother of Lt. Anup Sen  
C/o Kripal Baidya, T.K. Complex,  
Army Road, P.S.- Urban,  
Dimapur, Nagaland.  
(Mother of the deceased)  
..... Respondents  
**NOTICE UNDER ORDER V RULE 20**  
**OF THE CODE OF**  
**CIVIL PROCEDURE, 1908.**  
Whereas the above noted appellant has filed the aforesaid **MAC Appeal No.03** of 2026 challenging the Impugned Judgement and Order dated **03.10.2025** passed by the Member, Motor Accident Claims Tribunal, Dimapur, Nagaland, before the Hon'ble Gauhati High Court Kohima Bench, wherein you have been impleaded as respondent No.1. That by Order dated **23.04.2026** you are hereby called upon to appear before the Hon'ble Court after **4 Weeks** from the date of the order at **10:15 AM**, in person or by a pleader to act on your behalf. Take Notice that in default the matter will be decided ex-parte.  
Signed and sealed by Order of this Court on this the **24<sup>th</sup> April, 2026.**  
**Deputy Registrar (Judicial)**  
**Gauhati High Court Kohima Bench**



## TIR YIMYIM YIMOBILEM (EDITORIAL)

DIMAPUR TUESDAY, MAY (MONUPII) 12, 2026

### Asenok asoshi terata tulu !

**A**senok aikati Nagaland nung BJP teloki government mekümdaktsüner saka ano tang NPF teloki aniba government yaa maginer aser telok anaji toktsür tanga telok ka nokdakdaksütsüa makoker, anungji aonpu nung asotsü asü (?), mimong nung atsütsü ta asüba yimten tia nung asenok terata tulu nung nokdaka lir. Asenoki BJP telok maginüba ya BJP telok nung adener maginüba agi masü saka BJP teloki India nung Hindu yimsü dak alaka tanga tamangba yimsü mamangdaksütsü aser merenlok daksütsü asoshi anemba sentong aser mapatemji maginer. Asenok Khristan-tem asoshi balaka India tesem aika nung tenla ki raksatsüba aser tamangertem reshikangshiba atalok manener. Atangji, Nagaland nungbo item amaji Khristan-tem reshikangshiba mapatem mataloker, ibayongji asenoki BJP government kübok nisung aikati tashiyim amshia Khristan-tem anema inyakbaji zübazübaa bilema alitsüa akok. Aji oda, BJP teloki yimsü asüba state-tem nungbo joko Hindu nungerbo tanga tamangba yimsü dangi memeyiptsü asoshi ozüng küma lateta lir. Ibayongji, Hindu nungerbo tanga tamangba yimsü agizüka amangtsü memelar saka tanga tamangba yimsü amangertembo Hindu yimsü agizüka amangtsü melar. Aji oda, achiajemtsü nunga Hindu nungertemi machiba chiyongtsübo sademsadema meyoktetsüsa telenba ozüng agüja lir. Iba jagi India nung nashi shi bener jajatsüa tetsübuttsü aser tarendaktsü mapa ka kümogo. Ibayongji, India nung Khristan-tem lokti telungjemtemia RSS aser BJP teloki Khristan yimsü amangertem anema inyakba mapatem anema tasü itta ola adokba aiben angashir. Ano, India nung Khristan yimsü amangba yimten yimsüsürtem rongnunga, talisa, Meghalaya Chief minister, Conrad Sangma-ibo mapang mapang shia BJP government-i Khristan-tem timtem takoksa angutsüsa inyakdang jet ta ola adokba angashir aser tang Tamil Nadu nung tasenba Chief minister C. Joseph Vijay-ia Khristan yimsü anemertem anema ola agütsüogo, ajisüaka Nagaland Chief minister bang nungibo BJP teloki Khristan-tem anema inyakba mapa anema ola adokba kangabo mangashir. Aji, ashiko, Nagaland government nunga BJP dena aliba agi arendaker asütsüa akok, anungji Khristan-tem anema inyakba mapatem anema linük nung Khristan yimten yimsüsür kati ola madokra, ibaji Khristan anema inyakba mapaji shitaka ta agizükba den kasa akümer, anungji Khristan yimsü anema inyakba mapa nungbo, anemertem o anemertem anema ola madoktetba naji kasasa dang akümer. Anungji, tang ya Nagaland nung Khristan-tem asoshi BJP telok yaritsüba mangatet ulura amato aser NPF telok yaritsüba BJP telok yariba den kasa amato ta Tsüngrem sentong angatetsüba kanga tongtibang kümogo. Asenoki BJP telok maginer kechiyong parnoki Khristan yimsü anemer, saka asenok Naga nungertemi tentetba yimten teloktem ajaki BJP den medemner. Ibai BJP teloki meteta lir, anungji taruba election nungbo, ashiko, BJP telok ya Nagaland nung assembly constituency 60 prongla nung tokteptsüa akok aser item BJP telok nungi tokteper candidate-tem nüboyim sentong ajak nung asenok reverend pastortemi temoatsü aser takok meshia sarasademtsütsü. Iba tia nungji asenok ya tang taoa majung aser maoa majung ta asüba tia nung amangpeta amangba aser tenzükpeta tenzükba Khristan purtem kümogo. Iba tiaji Delhi nung alirtemi meteta lir, kechiyong asenok asoshi Yisua masü Ram-a masü saka sen dang tongtibang. Aji oda, Delhi nung alirtem anema ola tilaka danga adok nungbo, Naga nunger tulubai anir asenok ajak asüngbo tepuokdak ajuruteptsü, kechiyong asenoki ochimashi mapatem inyakba ya parnoki meteta dang lir aser ibaji parnok asoshi asenok azüoktsü tashi tuluka küma amshir. Yimten nungbo tajunga tamajunga odia inyaktsüla, aji oda tenünga odia asangtsü aser maginüra odia anemtsü. Ajisüaka, tang asenoki BJP maginü nemnemba yabo kidang mena yur tangar nungsen jembia kazür amato dang lir. Iba ama nungsen jembiba jagi yimten lateter masü saka yimjak nung ochi o yazü na bendangteta jembiba agi dang, yimtenbo lateter. Idangji, timtem takoksa ajurutsü saka aremtsüla. Laishiba nunga yamaji dang shia lir.

## OLEMSABANG

### SHILUNOKTAK - TAOCHI AENLENMANG

~ O. Tongpang Jamir

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

Tapu asem

Tenemi atuba

Taochibenla B.Sc renemer külen, ano M.Sc azüngtsü asoshi kangasa nungtugu University tajung, koba India lima tajungtiba ter rongnung ka liasü, yangji azüngtsü tatidang agütsü. Kodang tajaba shiti la dangi aru, lai memeteti nüktzü alu aser Tsüngrem tenüng asang.

Iba Post-Graduation (M.Sc) azüngtsüji mapa melara masü ; teinyaktsü zünger mezüngma, tetoktepbaji onsara, aser hostel nung kidang nungi talangka pilar alitsüba kanga azüngmeyak. Oda tazüngba toktsür kidangi meyipa odisü ta sa aiben lai bilema aru, saka iba mapang shiaji Tsüngremi la mulung nung tangula agi Mathi 19:26 yagisa jembia, "Nisungtem asoshi ya tamakoktsü, saka Tsüngrem asoshi ajak takoktsü."

Sarasadem, masetshiba mulungsentsü aser taochi ajanga, la M.Sc kanga junga takok ngutet. College nung tesayur ka ama inyaktsü temsüa akümtsü asoshi lai National Eligibility Test (NET) tatidang asoshi renem. Item hapta tepiyongji shisabulu khuret agia neneter, saka memejangi lesson azüngba, aser metangtangi sarasademba nung mapang endok. Lai kodang iba tatidang nung takok ngutet, tetsüi tepela agi nüktzü ayim. Lai la dak azüit aser ashi, "Abenla, Tsüngremi Par chir kodanga mamatoker akodi."

Saka ano la shisaluyimba aenlenmang metembang. Lai ano Shipurajem (Anthropology) nung Ph.D. agitsü asoshi tenzük. Nisung aikati la dang ashi, "Na kechiba mozüshitetba tsütsü, ozüng metetbalen mesüra ajaki tushitsüsa lenmang tapu aika lirji yangji aotsüba asü ato." Saka la asoshi, Shipurajem indang aroka bushitsüba la tejangraba liasü. Iba yagi meimchiryim indang bushir; iba indang toburjung, iba tsütsü koda taküm ka tuli/aluli ajurur, aser tsükdangradang balala den anogoshia ajuruteper. Lai lasasa la taküm indanga mejembitetba Shipurajem shisarokbushiba indangji yimdangi aru. Kibong yayim nung teraksa, shilunoktak (resilience), taitoktetba, mesüngjemtetba tia nung alidang temeim sayutetba, item ajak jagi lar kibong noksa nung tangloka liasü.

Tapu pezü

Sentsüpranglung yangerba mapang

La taküm nung tasaktiba mapang tenjiba rongnung kaji iba Ph.D. agiba kümtemji liasü. Küm ana tashi amang sangwa memeteti bushiba, taputem züluli ano zülushili, la lenisür shisarajemer telok tsüngdang akok tashi tajungtiba agi sayutsü merangli ano tanaben inyakshitsü agütsüli asü. Lasasa khenkenbo toktsütsüa bilema aruli asü.

Saka Tsüngremisa aochirji Pai teyarir tajungtiba yok; lentuyuri (mentor) animesoba, medemer nungi taochi otem, ojalai sarasademtsüba. Tesüsa kümnabuba nung la dangi osang aru, "Dr. Taochibenla, ne nem congratulation agütsüra nuji." Iba tepela olaji la kijai ajangzükba masü ta lai metet. Ya ojalai bendanga agüja inyakba, lar adianutemi yariba, tenu tanubosang tai maketba menürem jakden, ajak dak alia, ibai Tsüngremer metangtanga taochi ajanga liasü.

Iba sülen ano maneni la asoshi amsang nung maken nülok (icing on the cake) ama morosepba ayongbangtzü ka ngutet. Nagaland Public Service Commission (NPSC) ajanga agiba Shipurajem indang Assistant Professor tatidang lai agütsü. Iba tetoktepbaji ya kanga tasak, tesem balala nungi aruba lanurtemji takutet aser mongintem dang liasü. Prelims nung takok anguba osang aruji tasüitshir ano mains nung oa agüja ajangtet. Joko tebang o tatidang (viva voce) agütsütsü renemshi. Sarsadema Tsüngrem dak tamang yur ibaji agütsütsü asoshi ao.

Tasüngdang mezüngbuba : Taochibenla, Shipurajem ya meimchir indang bushiba ta nai meteta lir, koba agi iba sobaliba ayimsünga aoba aser temeyoktep nung koda aor iba indang ashir. Ibalu nung asenoki tejangja bushitetba alitsüla, naia iba nung ya na Tsüngrem dak chichia amangba tamang den puinren bushiba (scientific study) anaji metsüktepi koda petpeta bener arutetsü?

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



May 06, 2026 nü Pennsylvania kübok Indiana Township (Allegheny County) nung aliba Trinity United Church of Christ Tenla ki arondang tangokba noksa nung angur. Arogo küm 175 ajungbamong amongdang Tenla kidang mi adokba ajanga kilem rangben rondok.

## April ita nung Europe nung Khristantem anema inyakba tatalokba 38 liasü

**May 11, 2026:** April ita nung Europe tesem balala nung Khristantem anema inyakba tatalokba 38 liasü, item tatalokbatem rongnung Easter tekülem sentong tagidak mapang timtem agütsüba, Tenla ki raksatsüba, Tenla ki rongdoktsüba, putirtem aser züngsemtem dak azükba densema lir.

Observatory on Intolerance & Discrimination against Christians in Europe (OIDAC Europe)-i ashiba agi, taoba ita Europe tesem balala nung Tenla kitem raksatsü, Khristan leperitem aser Khristan temaitsütem raksatsüba tatalokba aika liasü.

Tesempa agi Khristantem anema inyakba tatalokbatemji teimbaka France (10) nung liasü, iba sülen Germany nung tatalokba tenet aser Italy nunga tatalokba tenet liasü.

OIDAC Europe-i, April ita nung Khristantem anema inyakba kanga renloka liasü; talisa Temeshi hopta aser Easter mapang nung Khristantem anema inyakba tatalokba aika liasü, ta metetdaksü.

Germany aser Italy na nung Tenla ki aika amak aser Ireland o Spain na nunga Khristantem dak azükba tatalokba aika liasü.

OIDAC-isa, Tenla kidang kürakyanglu raksatsüba, Kangki raksatsüba, temeshi sabang raksatsüba, leper nung Kangki raksatsüba aser satan indang yimiyim ayimba tatalokba aika liasü; talisa France aser Italy na nung item ama tatalokba aika liasü, ta metetdaksü.

Ireland nunga tekülem sentong tagidak mapang putir ka dak azük, Spain nung po amshia Khristantem amak aser Barcelona nung yimsü nung ajemdaker Khristan tetsür ka dak azük, ta OIDAC Europe-i metetdaksü.

Iba dak alia April ita nungsa

Tenla kidang nungi auyaba, Tenla ki rongoktsütsü merangba aser Khristan leper raksatsüba tatalokba liasü.

Countryside Alliance-i ashiba agi, 2025 küm UK tesem balala nung Tenla kitem aser Arogo kiojentem anema inyakba tatalokba 4,000 jungnüa liasü, aser item tatalokba nungi 271 bo Wales kija nung liasü.

OIDAC Europe-i, item tatalokba ajanga Europe nung maneni Khristantem anema inyakba ajanga Khristantem aser Arogotem kongshiba kuli sayur, ta metetdaksü.

Iba dak alia ketdangsertem aser yimtenren dak sendakba nung Khristantemi takoksa anguba tatalokba aika lir.

Northern Ireland nung taoba mapang pastor Clive Johnston-i tanur raksaa indokba clinic ka anasa moapu nung tekülem sentong ayongzüka agiba atema pa pua liasü.

Ano Scotland nunga Rose Docherty-i Glasgow hospital anasa ozülu ka amer nokdakba atema Scotland buffer zone ozüng kübok la anema ken o benok.

Iba dak alia Europe tesem aika nung lenmang nung sayutsüngiba nokdang, aser molumi indang sayutsüngiba ashishir.

OIDAC Europe-i, iba ya lenmang nung sayutsüngir ka kija anema masü saka Arogo rangben anema benokba ozüng ka lir, ta aitsü.

## USCIRF-i India nung minorities anema inyakba kuli angadang

**May 11, 2026:** Brihostibarnü (May 7) U.S. Commission on International Religious Freedom-i India nung nütsüng ajema aliba- Khristantem, Muslim nungertem aser Sikh nungertem anema inyakba kulitem angadangba sülen parnoki America sorkar dang India nung asalentong yanglur minorities anema inyakba nokdangtsü mepishi.

USCIRF Chair, Vicky Hartzler aser Vice Chair, Asif Mahmood na leniba nung kulitem angadangba senden nungji taoba mapang sorkar ketdangsertem, shishashirtem, lawyers aser lokti tentet balala nungi lenirtem aika liasü.

Item kuli angadangba recording ji USCIRF indang website nung angutsü.

Hartzler-i, "India nung yimsü temeden jenjang tamajungba dang akümer. India sorkar-national, state aser local level ajak nung maneni yimsü temeden anema inyakbaji agizükteter. Nisung bendanga züngshiba ozüng amshir, yimsü lenirtem pua ayur aser minorities anema inyakba

menokdangteter," ta metetdaksü.

Kasa senden nungji India nung Foreign Contribution Regulation Act (FCRA) ozüng yanglushitsü benoka aliba aikati aitsü. Iba Bill ya taküm July 21 nungi August 12 tashi tzüngluruwa mongpu Parliament senden aliba mapang nung benoktsüa akok aser iba ozüngji agizükra ibaji ajanga license thinentür aliba Khristan melungtet teloktem densema melungtet telok balala indang kiojen agitsü atema sorkar nem temelaba agütsütsü.

New Jersey nungi Congressman, Chris Smith-i, 2022 küm Mother Teresa's Missionaries of Charity indang FCRA license thinenja liasü aser item ama tashi amshibaji ajanga kechi ataloktsüar sayur, ta metetdaksü.

David Curry & Associates Tir, David Curry-i, FCRA telatetbatemji nütsüng ajema aliba yimsü balala amangertem anema lir; tesüiba küm ishika tsüngda India nung melungtet telok 20,000 indang license bo

## ANOGO ABEN TSÜNGREM DEN

### Khristan Tekülem

#### Mathi 4:1-11

Yihuda nunger yimsü nung lenir tulu kati Yihuda nunger aser khristantem kasa tekülem nung tajangzük anguba ajitetba ka yamai ashi: "Nisungi Tsüngrem indang bilema malitsü akok, saka Tsüngremi nisung atema kanga bilemstür". Ibai bushitettsü tatempangba lemangji tekülebaji lir kechiaser tekülebaji taküm aliba lemang ka lir. Tsüngrem tesangwa nung alimaji anguba lemang ka.

Koba yimya nung chichiba Khristan tekülem yimiyaji sayur? Putu ajak nung, mapa ana maneni külemi alir. Itemji sayutsüngiba aser oji angashiba, aser Kibuba Benjung agiba. Parnok inyakba yimya balala süaka, ka jembir aser ka mapa agi sayur, saka itemji mapabo kasadang. Anapronglai Khristai alangzükba taochi osangtajung ain aser sentsüwangshi nung sangdonger.

Anungji ozüngji odang lir. "Nai Kibuba ne Tsüngrem külemang". Kechiba? Tekülemji Khristan kija takümi Tsüngrem yimli nung shilem agia adenba lir. O ka nung, yangi asen tekülemji, kotak nung külemba tashi mait ongmedang dang lir.

Itemi shisadangang: Tang nai Tsüngrem mebilemer mesüra shinga mebilemer ta bilemer asü? Iba teblemstü aneptsü asoshi nai kechi merangdang? Tembarten den jembir asü? Counselors den jembir asü? Tsüngrem den jembitsü koda? Ne taküm nung tekülem nem mapang agüja ali asü mali?

Kü tanela nok nungi kümzükang, kü taküm azü tashi nungi kümzükang. Molusongzü bang nungi kümzükang; arem nashi pungchi nungi Nai kümzükang. Aser tesüneptsüba Tsüngremi nenok tetsüng kübok Satan ajemshitsü.

thinentsüogo, ta metetdaksü.

Smith-isa US Secretary of State Marco Rubio dang, New Delhi nung Quad Foreign Minister tem senden ayongzüka aliba mapang nung India nunger ketdangsertem den FCRA indang süoka jembitsü mepishi.

Centre for the Study of Organised Hate Executive Director, Raqib Naik-i, 2025 küm India kübok state 21 nung sentong 1,318 nung tesempa o jembia liasü aser iba nungjagi shilem 88 bo BJP-i yimsüsüba tesemtem nung liasü; shilem 23 bo rara adokdaksütsü atema ajungshiba otem liasü, ta metetdaksü.

Naik-isa, 2014 küm nungi 2024 küm tsüngda Khristantem anema inyakba mesüra amokmerenba tatalokbatem shilem 555 agi teimba kümogo, ta metetdaksü.

Taoba mapang India nung Dalit Khristantem tenzüker pastor kati tezüluba nung, India nung pastor tem dak azüker, Khristantem amakba mapang nung tetsürtem dak tim mesüi bishir aser Hindu yimsü dangi

meyiptsü memelungertem tasü mang aremstü memelar, ta ashi.

Taoba mapang U.S. Ambassador-at-Large for Global Criminal Justice Ambassador Stephen Rapp-i, Assam aser Uttar Pradesh na nung Muslim nungertem kanga reshikangshir asütsüa akok, ta ashi.

Paisa International Criminal Court Prosecutor dang Bengali oshi jembiba Muslim nungertem Assam nungi kangshia Bangladesh-i meindokba ya bushisüngdangtsüla, ta ashi.

Taküm March ita nung USCIRF 2026 Annual Report sangdonga liasü. Parnoki taküm agi küm tenetbuba US State Department dang India ya Country of Particular Concern (CPC) list nung züngoktsü takhangba agüja liasü.

2020 küm nungi tenzüka küm shia USCIRF-i, India nung tamangba yimsü temeden anema inyaker, anungji iba linük ya CPC list nung züngoktsüla, ta mepishir.

AO OSHI ANGAZÜKDAK:

TANÜ ANGAZÜKTSÜBA OJANG



Yarang

(n) asangur dang ajaba ( term for a young man)

\* Aiürtemi yarang tajung aginer.

Yarem

(n) ayatrem, amang tiyongtsü (midnight)

\* Yarem nung tzü endoki aluba yimya ya majung.

OLONG PAITEP # 7502

Grid for crossword puzzle #7502 with numbers 1-17.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S\_\_\_i - (3)
9. Nisung rongnung telemasa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatabangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 7501 TELANGZÜBA

TIPIEN :

- 1. Semtu, 3. Lepko, 5. Bilem, 8. Ulu, 10. Tsünpang, 11. Tesangwa, 13. Aoksa, 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong, 6. Lungkak, 7. Milak, 9. Zünga, 10. Temopu, 12. Walu, 14. Ali.



ALOKBA O SANGREMER NA AJURUTEP :

- Alokba : Oko, nenokbo takar, tular, tashitemeter, yimsüsür aser tain, anungji ni asüngdangba ya shiangma ?Oko meimchir dak ya tenük kwi keta lir?
Sangremer : Asem keta lir, Tekolak nung ana keta lir, aser temolungjang tenük ka,
Alokba : Tetsürtem rongnung temolung tulutemji shirnok asütsü?
Sangremer : Ita sen agir tetsür aika temolung tulu alitsü,
Alokba : Süra Oko tatidang ya komala ka dangsa ajar kar shiangma?
Sangremer : 1. Tsüngrem tenzüker atema tatidang tulutibaji Arogo ya lir,
2. Tular atema tatidang tulutibaji Dept, nung development aruba ya lir,
3. Takar atema tatidang tulutibaji rongsen ya lir,
4. Hon atema tatidang tulutibaji mi lir,
5. Asangur atema tatidang tulutibaji aiür ya lir,
6. Yimsüsür atema tatidang tulutibaji Alima otsü ya lir,
7. Danü atema tatidang tulutibaji koya lir,
8. Neburtem atema tatidang tulutibaji Election ya lir,
9. Tamangertem atema tatidang tulutibaji Tamangertem ya lir,
10. Taintem atema tatidang tulutibaji sobaliba otsü ya lir,
11. Sangremer atema tatidang tulutibaji Amitsürtem ya lir,
Alokba : Oko, süra naa item tatidang rong nung kobala nung tsüker ?????
Sangremer : O Alokba !!!!!

Lilir : I. Kilang Ajem, Indisen, Dimapur.

Kaziranga National Park anasa shikarir nisung 3 apu



Guwahati, May 11, 2026

(Agencies): Assam kübok Lakhimpur district nung Deobarnü shikarir asem puogo aser parnoki Kaziranga National Park nung güntok khasettsü tasa atonga liasü.

Osang tejangja angazükba sülen Narayanpur nung par asem apu. Eastern Range, Gamiri, aser Crime Investigation Range, Biswanath Wildlife Division

külem telok kati iba mapa inyaka liasü.

"Taküm March ita wildlife offence ken o ka benokba den iba operation sendaktepa liasü. Par asem yagi park nung sixth addition area nung güntok khasettsü sentong liasü" ta Kaziranga National Park Director Sonali Ghosh-i ashi.

Iba mapang forest teams-i Majuli district kübok Ukhal

Chuk nung country-made prangpong, rifle bolt aser butt ngutetogo.

Par asem ya Majuli, Lakhimpur aser Biswanath district nung alirtem lir ta ktdangsurtemisa ashi.

March ita wildlife offence ka benokba nung forest ktdangsurtemi Gopaljarani area nungi .303 rifle ka den injang round 13 nguteta liasü.

Manipur MLA Thongam-i Kamjong arrtsülen semdang

Imphal, May 11, 2026

(Agencies): Thongju Assembly Constituency nungi BJP MLA Thongam Biswajit Singh-i Hombarnü Kamjong district nung India-Myanmar arrtsülen aliba yimtsüngtem sema senzüogo.

May 7, 2026 nü telungpurtemi arrtsülen aliba yimtsüngtem amakba asadangsü atema MLA Thongam-i minister tem aser MLA tem den külemi iba tesem

semdanga liasü.

MLA Thongam-i aniba teloki takoksa ajuruba kibongtem, yimtsüng ktdangpurtem aser telok balala den ajurutepa senakssem.

May 7, 2026 nü telungpurtemi India-Myanmar arrtsü anasa aliba Kamjong kübok yimtsüng aika amak aser mi senoktsü.

Iba tatalokba sülen Chief Minister Yumnam Khemchand

Singh-i Border Security Force ktdangsurtem den law and order tensa meyipa reprangshiogo.

Iba senden nung security tayongzükbatem indang jembi aser tensa mejungi akümba azüoktsü atema inyaktsü lemsatep ta Chief Minister's Office-i metetdaksüogo.

May 7 nü telungpurtemi Naga yimtsüng asem- Namlee, Wanglee aser Choro amak.

NEIGRIHMS pathology department-i South Asian sentong nung sempet 2 angu

Guwahati, May 11, 2026

(Agencies): North Eastern Indira Gandhi Regional Institute of Health and Medical Sciences (NEIGRIHMS) nung Department of Pathology-i South Asian sentong nung sempet agizükogo.

Paro, Bhutan nung 7 buba South Asian Academy of Cytopathology and Histopathology Conference alidang research tajung asüba atema iba sempet agütsü.

Department of Pathology nung Associate Professor Biswajit Dey-i oral paper presentation category atema

First Prize angu. Pai "Clinicopathological profile and molecular classification of muscle invasive bladder cancer based on a simplified panel of immunohistochemistry" study asüba atema iba sempet angu.

Ano, kasa department nungi Assistant Professor Naveen Kumar-ia "Molecular profiling and clinicopathological association of endometrial carcinomas presenting at a tertiary care institute of Northeast India" presentation atema Second Prize angu.

NEIGRIHMS nung research maparen inyakba

nung sempet anguba study anaprong ya shilem ka lir. Northeast nung kanga bulua adokba cancers indang molecular profiling nung temulung agüja research agir.

NEIGRIHMS Director Prof. Nalin Mehta-i tesayur anaprong nem tenüngsang agütsüogo aser rejui cancer research, molecular studies, aser academic excellence atema kanga merangba indang shisem.

Sempet angurtemi Department of Pathology nung Head Prof. Vandana Raphael dang la lenisüba aser teyari atema pelaba metetdaksüogo.

Dibrugarh nung ULFA(I) tenüng amshia sen meshir 3 apu



Dibrugarh, May 11, 2026

(Agencies): Assam kübok Dibrugarh nung lanur aseme United Liberation Front of Asom (Independent) züngsemtem ama sayua tashiyim agi sen meshiba atema puogo.

Doctor ka dang tashiyim agi sen meshia phone asüba aser SMS messages yokba atema pai police tsüngdang ken o ka benok. Iba nung ajemdaker DSP (Headquarters) Nayan Moni Barua lenisüba kübok Assam

Police-i bushisüngdang ka tenzüka liasü.

Iba mapang police-i tashiyim agi sen meshitsü merangba nisung asem maitüsü jangjatet. Par aseme doctor dangi SMS messages yok aser ULFA(I) tenüng amshia Rs 60 lakh meshiba shidi ka yok.

Par asem yagi Upper Assam nung aser talisa Dibrugarh o Sivasagar district tem nung ibala mesükba mapa inyaker asütsü akok ta bushisüngdang arudang metet.

Par asemprong pur Moran Police Station nung yua lir aser maneni asüngdangya südar ta Assam Police-i ashi.

# Philippine VP Sara Duterte anema ken o tanaben benoker



**Mindanao, Monupii/May 11 (Agencies):** Philippine House of Representatives-i Vice-President Sara Duterte anema anaben buba ken o benoktsü vote agütsüogo, anungji 2028 küm tir asoshi tokteptsü la sentong aliba nung tetsükdaktsü ajurur.

Hombarnü vote ajanga impeachment process ya Senate nung ken o tejangja bushitsü, aser aitsüra taoba tir Rodrigo Duterte jala ya public office nung amentsü metemsü akumtsü.

Tir Ferdinand Marcos Jr melentsü atema surveys agiba nung arishi küm 47 tain Duterte jenjang liasü.

Nüburtem meyong sen tim masüba nung amshi aser Marcos, pa kinungtsü aser par kinunger, taoba House speaker

amokmeren ta tai tongloktüsü nungi ken o ya tenzü.

2025 küm kasa ken o nung Duterte anema ken o benok, saka Senate trail metenzükdang technical tsütsü ajemdaker Supreme Court-i nokdanga liasü.

Ken o ya taküm kaktetshi. Tatong tir anema kuli bushiba House committee kati la anema ken o benoktsü kuli tejangja lir ta taoba hopta shia liasü.

Duterte-i tezüluba nung telangzüba ka agütsüba nung iba ken o ya kaket tamajung ka dang lir ta ashi. Lai committee hearings nung nokdaktsü memulung aser iba ya yimtenren tsütsü nungi tenük yoka inyakba ka dang lir ta ashi.

Hombarnü impeachment vote agiba sülen Duterte indang defence counsel ajanga

sangdong ka nung, ozüing nung aliba ama parnoki jembiba medentsü khuret tai atonger dak keta lir, ta ashi.

Hombar aonung impeachment vote agiba ya House nung Marcos bhukumer atema tensa melenshiba ka ama lir. Ozüing yanglur züingsem 290 adenba nungi züingsem 257-i Duterte anema ken o benoktsü mulunga vote agütsü, koba ken o benoka jembitsü nüngdakba 'one-thirds' dang nungi tali lir.

Ajisüaka House nung ama masü, Senate nung aitsütsü mejangja.

Philippine yimtenren ya sentsü aketer teyaritep aser dynastic alliances agi amokbanger lir, aser House züingsem ya legislative district ama shimer aser parnok ya senators dang nungi teinyakdak tir den tesendaktep tajungba lir.

Philippines nung senator 24 ya national level nung shimer aser Senate ya tarutsü nung tir mesüra tatong tir asoshi tokteptsü teimla alirtem asoshi jenjang tajung ka ama lir.

Duterte-i tir inyaktü asoshi toktepnüa bilema aliba February ita sangdonga liasü, aser Marcos ya constitution ajanga küm trok kümsük ka kisüing inyaktü melar.

## SENTEMSANG SEMCHIR UNGMA OLEPLANG

Tir Yimyim adok 204, Dated 8th May, 2026 Aor Jamir Mungdang osep nung YONGSEN Chir KUMCHU dak alaka tangar mali ta shia alibaji Ungma nung aliba Sentemsang semchirtemi aitsür.

Longjakrep Semchir Tera kaket tapak (page) 63 nung YONGSEN chir jakzük tepur 4 (four) 1. KUMCHU, 2. SENTEMSANG, 3. ZUOBA, 4. ALAPONG NUNGI ONGERTSUBA ta shia alibaji shitak ta kuli agütsür. Anungji item tepu 3 (three) dak jakzükba semchirtemi nenok nungi kuli tejangja aginür aser rajemtsü mulunga renema lir ta sangdonger.

Sd/-  
Wb. Imlisama Jamir, Tatar  
Ungma

Sd/-  
Wb. Imtipokym Tatar  
Ungma

## Yimjungatema Iran telangzüba Trump-i magizüker



**Dubai, Monupii/May 11 (Agencies):** United States-i yimjung atema proposal ka agütsüba nung Iran indang telangzüba Tir Donald Trump-i magizükba mechi Hombarnü totzü jenjang timba akum aser

hopta ter rara aruba ya ano atsülanga Strait of Hormuz ajanga rong mesenzütettsü südi ta tebilemtsü akar.

Yimjung ken o jembishinüba tenzüksütsü nükjiding nung Washington-i maongka agütsür anogo ishika lir Iran-i Deobarnü Lebanon densema tesem ajaklen rara tatem kati arutsü nung rangloker telangzüba agüja liasü. Lebanon nung US tembar Israel ya Iran-i yariba Hezbollah telungpur den rarar.

Tehran-i rara nung raksatsüba atema compensation meshir, Strait of Hormuz ya par meyong ta ashir aser United States dang rong tem mokdanga aliba tembangtsü akhanger, tarutsü nung mamaktsü guarantee meshir, sanctions agentsü aser Iran nunger totzü ayokba nokdanga aliba agentsü ashir.

Ghonda ishika tsüingta Trump-i social media post ka nung iba proposal magizük.

"Ni ibaji maginer - K H E N Y O N G I MAGIZÜKTETER," ta Trump-i Truth Social nung zülü saka iba dak tali tejangjaba kecha mashi.

Iran indang nuclear sentong densema tongtipang atsütepba ken o jembu metenzükdang rara tembangtsü US-i tebilemba lemsatetep.

Hombarnü Tehran-i telangzüba agütsüba nung par tangatetba bhukuma liasü.

"Onoki akhangba ya tim lir: rara tembangtsü, (US) mokdanga aliba aser piracy agentsü, aser US-i ajungshiba

mechi banks balala nung kuli tejangja makai soita aliba Iran nunger rongsen salatsü akhanger," ta Foreign Ministry odongtar Esmaeil Baghaei-i ashi.

"Timtem makai Strait of Hormuz ajangtsü aser region aser Lebanon nung security amenoktsü ya Iran indang takhangba liasü, koba aria bilema aser khuret angateta maongka agütsüba amai lir."

Febuary 28 nü rara metenzükdang iba tzu lenmang temesü ya ajanga alima indang totzü aser liquefied natural gas shilem 20 shi bena liasü, koba tangbo shibanga lir.

Trump ya Bodhbarnü Beijing tonga arutsü imlar, kong Iran ken o ya China Tir Xi Jinping den jembitsü. Washington den tezüingzüktep yangluang ta Tehran ajungshitsü atema Trump ya China dak metaloka lir.

Ajisüaka Baghaei-ibo, "Ozü tembar China-i iba maongka amshia US dang pari ozüing alema inyakba aser mesüshiba ajanga timtem ajurutsü aliba indang ashitsü kanga junga meteta lir," ta ashi.

Iran anema raraba tembanger asü ta asüingdangba mapang, "Parnok madak takok nguogo, saka aji tatembang masü," ta Trump-i langzüba Deobarnü prokshia liasü.

Israel Ati Kilonser Benjamin Netanyahu-i rara metembang, kechiaser Iran nungi enriched uranium agentsü, enrichment facilities raksatsü aser par proxy forces aser ballistic missile indang jembitsü mapa lir, ta ashi.

Iran Tir Masoud Pezeshkian-i social media post ka nung Tehran-i kodanga tsükchir matsüingdang mapudaktsü aser tashi amshia linük tejangraba kumzüka ayutsü, ta ashi.

## Taoba Thailand PM Thaksin tepuokdak nungi chiokogo

**Bangkok, Monupii/May 11 (Agencies):** Taoba mapang Thailand PM Thaksin Shinawatra Hombarnü parole nung tepuokdak nungi chiokogo. Okadak kati pa tepuokdak ayutsü atema obendang agütsüba sülen ita ti lir tang pa chiokogo.

Arishi küm 76 tain tycoon yagi küm 25 tashi Thailand nung yimden yimsüsüba amokbanger aruogo, saka pa tepuokdaki aiba sülen tashi ajema kümogo aser par Pheu Thai Party koba taoba mapangbo kanga wangshia liasü, iba party ya taküm küm tetenzüklen election nung kanga mejungi tamakok ngua liasü.

Pa Bangkok indang Klong Prem tepuokdak nungi chiokba

mapang par jala Paetongtarn Shinawatra densema kinungertem aser pa pusemertem agizüka liasü. Paetongtarn ya taoba küm August ita okadak kati Ato Kilonser mapa nungi anenja liasü.

Osangbenertemi koma bilemer ta asüingdangba mapang, Thaksin-i kanga anisüingzükogo, ta langzü.

"Ni hibernante asüi ao. Ni tangbo kecha meblemeter," ta pai langzü.

Küm 15 tashi bendanglen oa aliba sülen Thaksin ya 2023 küm par party den sendaka alir ka PM akümba anogo linüki meyipa aru. Pa ya 2021 nungi 2006 tashi PM asüba mapang

tashi alia amshiba aser tejangraba meputepba atema küm ti tepuokdak ayutsü obendang agütsü.

Ajisüaka tepuokdak aonung ka danga memejangi pa temulungjang nung timtem lir ta shia mozüki ka VIP wing-i anir ao. Iba sülen pa tepuokdak ayutsü obendang agütsüba ya Chubai küm ka dang kümtsü, koba ita trokbo mozükidang munga liasü.

Ajisüaka Supreme Court-i, pa aser pa indang doctor temi tashidak tilateri aser nüngdakba makaba surgery agiba atema pa mozüki dang talangka mungdaktsü ta shia tepuokdak atakzükja aliba mapang entoktsü obendang agütsü.

## EU-i Syria den tesendaktep yanglushitsü lemtet

**Brussels, Monupii/May 11 (Agencies):** European Council-i Syria den lenla kar nung tesendaktep mayutsü atema telemtetba agir aliba aginba sülen taoba mapang ama tesendaktep yanglushiogo. Küm 14 tashi rara nung aruba sülen Syria ya tang yanglushitsü merangba mapang ka nung EU-i iba telemtetba agiogo.

Council-i Himbarnü iba telemtetba agiba ya European Union aser Syria na tesendaktep nung tongtibang jenjang ka asütsü.

Iba telemtetba ajanga Syria den tanaben teka amteper inyaka, parnok rongsenketzüng mejungi aliba yanglushitsütsü atema EU bendanga agütsür aliba sayur, ta European

Council-i ashi.

Kasa mapang nung EU indang foreign minister tem Brussels nung Syria nunger lenir Asaad al-Shaibani den senden ka mena, Syria yimsüsür Bashar al-Assad atsüingtokba sülen ita 18 lir yimden yimsüsüba nung sensaksem tenzüksühiogo.

2024 küm December ita al-Assad atsüingtokba sülen linük 27 agi kümtetba lokti tetet yagi Syria den tapak tasen ka lapokogo.

January ita Damascus nung Syria indang interim tir Ahmed al-Sharaa den senden ka amenba mapang European Commission chief Ursula von der Leyen-i, Syria yanglushitsü atema Europe-i takokba tashi nongita yaritsü ta tenangzükba

agüja liasü. Commission-isa, taoba ita EU state temi Syria den tesendaktep tanaben yanglushitsü atema benoka liasü.

Iba tenangzüktepba ajanga Syria nungi belener aruba oset aser talisa industrial product tem nung duties tem agintsüba densema lir, koba 2011 küm al-Assad-i aniba sorkari longkak aiterem tashiyim agi azüoka civil war tenzüka sülen benoka liasü.

Syria-EU na shishiklemba ya 2010 küm bo euro billion 7 tashi junga liasü.

2023 küm tashi nungbo Syria nungi EU import tem ya euro million 103 aser Syria dangi European export tem euro million 265 dang küma liasü.

## 2buba Nagaland Women Futsal League tenzükogo



**Kohima, Rongchii/May 11 (TYO):** 2buba Nagaland Women Futsal League 2026 Hombarnü nikongtsütsü Indira Gandhi Stadium, Kohima nung tawa lapokba Futsal Ground nung tenzükogo.

Asayamung lapokba sentong nung Secretary to the Government of Nagaland, Women Resource Development Department, Zhothisa Dawhuo alakteta jaoker liasü.

Sentong nung o jembiba mapang Dawhuo-i, saisabong ya tetsürtem nem tashi agütsütsü aser gender equality atema maneni hadir tongtibang rongnung ka lir ta ashi. Paisa, saisabong nung tetsürtem nongita yariba ajanga lenisüba, taremsük, teamwork angazükdaktsür aser lanur asayartem peisasa dak temlung lemteta kümdaktsür, ta ashi.

"Mapang talangka saisapong ya teburtem atema ta bilema aruogo. Tanübo iba ya melenshidar," ta pai ashiba den, tetsür asayartem nem kasa maongka, training aser resources agütsütsü nungdakba lemsatop.

Maneni paisa, tetsür asayartem ya lanurtem

nükjidong tulu yudaktsütsü aser lokti nung lenir akümsü atema nükkrangdong ka lir, ta ashi.

Iba league takok ngua ayongzükba atema Department of Youth Resources & Sports aser Nagaland Football Association nem tenüngsang agüja jembiba mapang Dawhuo-i, iba ajanga tetsürtem saisabong nung shilem agütsü atema ajungmesotsü ta ashi.

Sentong nung NFA tir K. Neibou Sekhose-i lokti pela agizükba o jembiba mapang, iba asayamung ya Nagaland nung tetsürtem football asaya tarutsü lir ta ashi.

Paisa, league koba tetsür football asayartem nem sabang tapet ka agütsütsü nükjidong nung küm ana tejakdang tenzükba liasü, iba league ya renloka odar, aser Nagaland kübok tesem balala nungi team tem aser tetsür densema licensed coache aser certified referee temi shilem agidar, ta ashi.

Sekhose-i, asayartem dang tejangraba tulu nung aser kati ka akümsübutepa asayatsü ajungshiba den, parnok ya pei yimtsüng, kin, district aser Nagaland tenüng nungi asayar ta mamatoktsüla, ta ashi.

Paisa, pei jalatem football asayadaktsütsü atema nongita yariba atema tsürapurtem nem tenüngsang agütsü.

Iba league ya Department of Youth Resources & Sports, Government of Nagaland aser Nagaland Football Association na longjemer ayongzükba lir.

Asayamung akokba team nem senpet sen 60,000 agütsütsü aser tanabuba aser tasembuba jenjang nung tembangba team ana nem senpet sen 50,000 aser 40,000 agütsütsü. Pezübuba nung tembangba team nem 20,000 agütsütsü.

Jurila sempettem rongnung Player of the Tournament, Best Goalkeeper aser Top Scorer densema lir aser parnok nem senpet sen 5000 agütsütsü. Maneni Best Discipline Team nem senpet sen 10,000 agütsütsü.

Asayamung lapokba sentong ya Joint Secretary to the Government of Nagaland, Youth Resources & Sports Department Temjensangla lenisüba nung agi aser PCRC nungi Pastor Vikhoto Zao-i sarasademer tenzükba liasü.

Mezüngbuba asaya nung Kohima Red Tigresses-i Pink Panthers Kohima koka liasü.

## Sindhu, Sen nati anir India nungertem Thailand Open asayatsü

**Monupii/May 11, 2026 (Agencies):** Lakshya Sen aser PV Sindhu nati anir India nung badminton asayartem Thailand Open Super 500 tournament nung asayatsü. Iba asayamung ya Bangkok nung Mongolbarnü nungi asayatsü.

Seventh seed Lakshya, shiba Thomas Cup nung yirua France den semifinal nung masayatet, pa mezüngbuba asaya Singapore nung asayar Jason Teh Jia Heng den asayatsü aser Ayush Shetty Japan nung sixth seed Kodai Naraoka den asayatsü.

Tetsür kija asaya nung Sindhu mezüngbuba round Chinese Taipei tsür Tung Ciou-Tong den asayatsü. La taküm Malaysia nung semifinal aser Indonesia nung quarterfinal tonga asayaogo, saka asayamung ka danga mekoki lir.

Teburtem rongnung Kidambi Srikanth eighth seed Loh Kean Yew den asayatsü, koba 2021 World Championships final asayashiba ka asütsü.

Tharun Mannepalli, shiba yiruba ajanga mapangshia timtema arudar, pa iba asayamung nung mezüngbuba Japan nung asayar Koki Watanabe den asayatsü.

Tetsürtem rongnung ano Unnati Hooda fourth seed Pornpawee Chochuwong den, Devika Sihag Japan tsür Natsuki Nidaira den aser Tanvi Sharma Hina Akechi den asayatsü.

Malvika Bansod-a mezüngbuba asaya Canada tsür Wen Yu Zhang den asayatsü aser Anmol Kharb taoba mapang Olympic champion Chen Yufei den

asayatsü.

Tebur tarep asaya nung top seeds Satwiksairaj Rankireddy aser Chirag Shetty na Indonesia nung tarep Muh Putra Erwiansyah aser Bagas Maulana na den asayatsü.

Seventh seeds Hariharan Amsakarunan aser MR Arjun nata Chinese Taipei nung tarep Chen Zhi Ray aser Lin Yu Chieh na den asayatsü.

Tetsür tarep asaya nung Rutaparna Panda aser Swetaparna Panda na kija asayatsü, aser tena Taiwan tsür Lin Chih-Chun aser Yang Chu Yun na den asayatsü.

Tarep temetoktep asaya nung Rohan Kapoor aser Gadde Ruthvika Shivani na, Dhruv Kapila aser Tanisha Crasto na aser Ashith Surya o Amrutha Pramuthesh nung asayaba angutsü.

## World Cup asayatsü lia Nico Williams hamstring yiruogo

**Monupii/May 11, 2026 (Agencies):** World Cup asayatsü anogo ishika dang anunga lia Spain asoshi tetsükdaktsü adoka midfielder Nico Williams Athletic Club indang La Liga asaya ka nung hamstring yirur tugutsüsa aküm.

Deobarnü Athletic Bilbao pur goal 1-0 agi Valencia makokba asaya nung Williams ya asaya mezüngbuba shilem nung yirur tuguatok, aser iba ajanga European champions Spain pur tebilemstü bendenloktüsügo, kechiyong World Cup asayatsü ita ka dang anunga lir.

Arishi küm 23 tain asayar ya ya tejak ashir ground nungi tugu aser tetsüng tabelen hamstring nung pad ka enoker bench nung mena aliba nguogo. Pa ya taküm küm tetenzüklena yiruba ajanga hopta ishikabo masayai liasü.

2022 küm nungi tenzükba Williams Spain national team nungi asaya arudar, aser pai tang tashi nung asaya 30 nung goal trok idaktsür lir. Pai tang asaya aliba season nung Athletic Club atema asaya 32

nung goal trok idaktsüba den assist tenet sütsür lir.

Nüngtugu forward Lamine Yama yirur aliba atema tebilemstü ka-a aliba mapang tang ano pa yiruba ya Spain asoshi tetsükdaktsü ka lir. Yamal ya taoba ita Barcelona nungi asayaba mapang hamstring yirua liasü.

World Cup nung Spain team ya Group H nung ata lir. Parnok mezüngbuba asaya ana Atlanta aser Georgia na nung Cape Verde den June 15 aser Saudi Arabia den June 21 nü asayatsü. Group stage nung tatembangbuba asaya ya June 26 nü Guadalajara, Mexico nung Uruguay den asayatsü.

"Pa kanga aloka jaja liasü. Pai taoba mapang iba amala majangshidang," ta Williams indang Athletic teammate Inaki Williams-i ashi.

Athletic-i Williams yiruba indang osang tejangjabo agüja mali.

Spain coach Luis de La Fuente-i, iba hopta World Cup atema preliminary squad nung asayar 55 tenüng sangdongogo.

## Barcelona-i season anabuba atonga La Liga title benogo

**Monupii/May 11, 2026 (Agencies):** Deobar aonung Real Madrid pur goal 2-0 agi akokba sülen Barcelona-i La Liga 29benbuba kokogo. Season atemtsü atema asaya asem anunga lia parnok tanabuba jenjang nung aliba Madrid team dang nungi point 14 agi timba küma iba asayamung kokogo.

Asaya mezüngbuba shilem nung Marcus Rashford aser Ferran Torres nati goal kaka idakja Hansi Flick-i aniba team yagi season anabuba atonga La Liga benogo, aser kasa mapang nung Madrid pur takok marok ka danga mongui season tembangogo.

Tang agi tanabenbuba-ang Clasico ka asayaba sülen La Liga takoker jangjaogo. 1932 küm Barca den draw asüba sülen La Liga 36 ben koka aliba Real Madrid yagi Clasico ka asayaba sülen title bena liasü.

Flick-i aniba team ya April ita Champions League quarterfinals nung Atletico Madrid-i tsükdakja liasü.

"Kidang Madrid koka title abenba atema kanga pelar. Onok fan tem den benjungtsü," ta Barca midfielder Frenkie de Jong-i ashi.

Iba asaya masaya tsüngda Madrid pur mepetmesü nung

liasü. Midfielder Fede Valverde külem teammate Aurelien Tchouameni den training ground nung mangatettep adokba sülen tekola yirua iba asaya nung masayatetsüsa aküm.

Asaya nung Barca coach Flick-i, yirur alisang Lamine Yamal melena tachichilen Rashford asayadakja liasü.

Barca pur iba title abentsü atema tamakok dang mangutsü nungdaka asaya tenzük aser minute 18 tsüngda parnoki goal ana idaktsü.

Mezüngbuba goal ya Rashford-i goal nungi yard 20 pilar free kick ka ajanga idaktsü.

Iba sülen Dani Olmo-i kanga sangra agütsüba ball ka Torres-i kanga junga agizüker lua Thibaut Courtois adena goal idaktsü. Asaya nung Kylian Mbappe melena asayasang Gonzalo Garcia-ia goal idaktsütsü maongka angu saka magütsüteti liasü.

Maneni asaya nung Rashford, Torres aser Fermin Lopez nungeri goal idaktsütsü asoshi maongka angu saka magitet.

Madrid atema Jude Bellingham-i goal ka idaktsü, saka pa offside asüba ajanga iba goal magi aser Vinicius Junior-i metsüba ball Joan Garcia-i kanga junga nokdanga liasü.

## BILEMDANGANG

"Mapa medenra bilemba kija agi temelenshi madoktsü."